

---

BOSNA I HERCEGOVINA  
Federacija Bosne i Hercegovine  
KANTON SARAJEVO  
GRAD SARAJEVO  
GRADONAČELNIK

---



**Grad Sarajevo**  
**City of Sarajevo**

---

BOSNIA AND HERZEGOVINA  
Federation of Bosnia and Herzegovina  
CANTON OF SARAJEVO  
CITY OF SARAJEVO  
MAYOR

---

**ODLUKA**  
**o Danu obilježavanja opsade Sarajeva 1992.-1995.**  
**(prijedlog)**

**Predlagač: Gradonačelnik**  
**Obrađivač: Gradska služba za**  
**europske integracije i EU fondove**

**Sarajevo, maj 2019. godine**

---

**Adresa:** Hamdije Kreševljakovića 3, 71000 Sarajevo, Bosna i Hercegovina  
**Tel:** +387 33 208 340, +387 33 443 050; **Fax:** +387 33 208 341  
**e-mail:** grad@sarajevo.ba; **web:** www.sarajevo.ba



**EYOF 2019**

**Sarajevo & East Sarajevo**

Na osnovu člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08-prečišćeni tekst), Gradsko vijeće Grada Sarajeva na \_\_\_ sjednici održanoj \_\_\_\_.\_\_\_\_. 2019. godine, donosi

(prijedlog)

**ODLUKA**  
**o Danu obilježavanja opsade Sarajeva 1992.-1995.**

**Član 1.**  
**(Predmet Odluke)**

Ovom Odlukom utvrđuje se 5. april kao Dan obilježavanja opsade Sarajeva 1992-1995 i propisuje način njegovog obilježavanja.

**Član 2.**  
**(Cilj)**

Cilj obilježavanja opsade Sarajeva je da se na prigodan i dostojanstven način prisjetimo najduže opsada jednog glavnog grada u savremenoj historiji ratovanja, patnje, hrabrosti i herojskog otpora stanovnika i branioca Sarajeva u opsadi i da odamo poštu građanima Sarajeva ubijenim tokom opsade grada.

**Član 3.**  
**(Način obilježavanja)**

- (1) Općine koje su u sastavu Grada mogu predložiti program, odnosno projekte u cilju obilježavanja datuma na koji se Odluka odnosi gradonačelniku Grada Sarajeva.
- (2) Konačni Program aktivnosti za Dan obilježavanja opsade Sarajeva 1992.-1995. utvrđuje gradonačelnik Grada Sarajeva i najkasnije na septembarskoj sjednici predlaže Gradskom vijeću usvajanje Odluke o davanju saglasnosti na Program aktivnosti za Dan obilježavanja opsade Sarajeva 1992.-1995. za narednu godinu.
- (3) Za potrebe obilježavanja opsade Sarajeva gradonačelnik je ovlašten, neovisno od Programa aktivnosti za Dan obilježavanja opsade Sarajeva 1992.-1995. iz prethodnog stava ovog člana, da Gradskom vijeću u toku cijele godine predlaže različite projekte koji su u funkciji ostvarivanja cilja utvrđenog u članu 2. ove odluke.

**Član 4.**

Odluka stupa na snagu osmog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Igor dr. Gavrić**

Broj:

Sarajevo,

## OBRAZLOŽENJE

### PRAVNI OSNOV

Pravni osnov za donošenje ove odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće **donosi odluke**, druge propise i opće akte i daje njihovo tumačenje.

### RAZLOZI ZA DONOŠENJE

Opsada Sarajeva bila je jedna od najdužih opsada u historiji modernog ratovanja i tako najduža opsada jednog glavnog grada koja je trajala puna 44 mjeseca., tačnije od 5. aprila 1992. godine do potpisivanja Dejtonskog mirovnog sporazuma u Parizu, 14. decembra 1995. godine. Opsadu Sarajeva uspostavio je 4 korpus JNA, koji je 14 maja preimenovan u Sarajevsko-romanijski korpus Vojske Srpske Republike BiH. Grad je bio opkoljen i provodila se svakodnevna kampanja snajperskog djelovanja i granatiranja civila u Sarajevu. Procjenjuje se da je oko 500.000 projektila ispljeno na grad za vrijeme opsade, dok je zabilježeno da je dana 22. jula 1993. godine na grad ispljeno rekordnih 3.777 projektila. Na grad je dnevno u prosjeku ispaljivano 329 granata. Stanovnici Sarajeva su za vrijeme trajanja opsade bili bez hrane, vodoopskrbe, električne energije i ostalih energenata, a nakon paljenja centralnog objekta pošte 02 maja 1992 godine građani Sarajeva su prekinuli svaki kontakt sa vanjskim svijetom. Za vrijeme trajanja opsade građani Sarajeva nisu imali ni ulaz ni izlaz iz opkoljenog grada. Opsada Sarajeva i kampanja granatiranja i snajperskog djelovanja sistemski je uništila kompletnu infrastrukturu grada, a ogromne materijalne štete nanese su svakom objektu u gradu, uključujući objekte kulture i vjerske objekte. Za vrijeme trajanja opsade život je izgubilo više od 10.000 civila od čega više od 1000 djece, a preko 50.000 civila je ranjeno. Opsada Sarajeva ostavila je trajne posljedice na život i zdravlje svakog stanovnika Sarajeva koji je za vrijeme opsade bio u Sarajevu. Za opsadu Sarajeva i provođenje svakodnevne kampanje snajperskog djelovanja i granatiranja civila u Sarajevu pred Međunarodnim krivičnim sudom za bivšu Jugoslaviju (MKSJ) po komandnoj odgovornosti pravosnažno su osuđeni Biljana Plavšić, Momčilo Krajišnik, Stanislav Galić, Mićo Stanišić, Stojan Župljanin, Dragomir Milošević, Radovan Karadžić a po prvostepenoj presudi Ratko Mladić.

Otpor građana i branioca Sarajeva, sve njegove žrtve i sama historija nam namaće obavezu da jedan dan u godini obilježimo opsadu Sarajeva, te da se tako na prigodan i dostojanstven način prisjetimo najduže opsada jednog glavnog grada u savremenoj historiji ratovanja, patnje, hrabrosti i herojskog otpora stanovnika i branioca Sarajeva u opsadi i da odamo poštu građanima Sarajeva ubijenim tokom opsade grada. Istovremeno, obilježavanjem opsade sjećamo se i dostojanstva Sarajeva i njegovih stanovnika koji su u vihoru rata, u gradu pod opsadom branili civilizacijske vrijednosti, ljudsko dostojanstvo i suživot njegovih stanovnika i tako pružali otpor, ujedno prkoseći i kroz umjetnost i kulturu. Stoga, obilježavanja opsade Sarajeva 1992-1995 ima državno-pravni i politički značaj, međunarodni značaj, historijski značaj, odgojno-obrazovni značaj, moralni značaj i njeguje kulturu sjećanja koja mora stremiti stvaranju takvog društva i svijeta u kojem se nikome i nikada neće ponoviti patnje grada Sarajeva i njegovih stanovnika.

### OBRAZLOŽENJE PREDLOŽENIH RJEŠENJA

Tekst Prijedloga Odluke o Danu obilježavanja opsade Sarajeva 1992.-1995. je, na temelju provedene javne rasprave o Nacrtu Odluke, izmjenjen u odnosu na Nacrt Odluke na način da su prihvaćeni prijedlozi i sugestije Općine Stari Grad Sarajevo i prijedlog Komisije za Statut i akte Gradskog vijeća Grada Sarajeva. Prijedlog Općine Stari Grad Sarajevo se odnosio na davanje mogućnosti predlaganja programa i projekata u cilju obilježavanja Dana opsade Sarajeva. Sugestija Komisije za Statut i akte Gradskog vijeća Grada Sarajeva se odnosila na izmjenu naziva iz „Odluka o obilježavanju opsade Sarajeva“ – kako stoji u Nacrtu, u „Odluka o Danu obilježavanja opsade Sarajeva 1992.-1995.“.

Članom 1. Odluke definira se predmet Odluke, odnosno utvrđuje 5. april kao Dan obilježavanja opsade grada Sarajeva 1992.-1995. i propisuje način njegovog obilježavanja. Prilikom određivanja Dana obilježavanja opsade Sarajeva 1992.-1995. uzeo se dan kada su zvanično postavljene barikade na međunarodnom aerodromu Butmir, a zatim i u naselju Grbavica. 5. aprila 1992. godine održale su se demonstracije građana Sarajeva za mir, a na kojima su građani Sarajeva tražili od agresorskih snaga da uklone barikade i da se povuku. Na okupljene građana Sarajeva zločinačke snage su počele pucati sa krova hotela Holliday Inn, a okupljeni demonstranti su se uputili ka tadašnjem mostu Vrbanja i barikadama sa ciljem njihovog uklanjanja. Snajperisti koji su već bili pozicionirani na obližnjim objektima otvorili su vatru na narod i tu, na mostu ubili Suadu Dilberović i Olgu Sučić, koje su zvanično i prve žrtve rata i opsade Sarajeva 1992-1995. godina nakon postavljanja barikada. Članom 2. Odluke definiran je cilj obilježavanja opsade Sarajeva i to da se na prigodan i dostojanstven način prisjetimo najduže opsada jednog glavnog grada u savremenoj historiji ratovanja, patnje, hrabrosti i herojskog otpora stanovnika i branioaca Sarajeva u opsadi i da odamo poštu građanima Sarajeva ubijenim tokom opsade grada. Članom 3. Odluke definirano je da Program aktivnosti za Dan obilježavanja opsade Sarajeva 1992.-1995. utvrđuje gradonačelnik Grada Sarajeva i da najkasnije na septembarskoj sjednici predlaže Gradskom vijeću usvajanje Odluke o davanju saglasnosti na Program aktivnosti za Dan obilježavanja opsade Sarajeva 1992.-1995. za narednu godinu. Gradonačelniku je data mogućnost i da za potrebe obilježavanja opsade Sarajeva neovisno od Programa aktivnosti za Dan obilježavanja opsade Sarajeva 1992.-1995., Gradskom vijeću u toku cijele godine predlaže različite projekte koji su u funkciji ostvarivanja cilja Odluke. S tim u vezi, će se za svaku godinu utvrđivati program prigodnih aktivnosti ili projekti kojima će se obilježiti Dan opsade Sarajeva 1992.-1995., a time i stvoriti okvir za potrebna finansijska sredstva koja se za tu svrhu trebaju planirati u Budžetu Grada Sarajeva. Aktivnosti mogu uključivati različite manifestacije, performanske i centralne svečanosti kao što su, između ostalog,: organiziranje kolone sjećanja, centralne akademije, polaganje cvijeća, izložbe, postavka sarajevske crvene linije- stolica sjećanja na ubijene Sarajlije i djecu Sarajeva (kao tradicionalna i stalna postavka na Dan opsade), izgradnja centralnog spomen obilježja žrtvama opsade Sarajeva i ostalih pogodnih spomen obilježja, izgradnja vatrenih tačaka opsade na okolnim brdima i uzvišenjima oko Sarajeva sa kojih je vršeno granatiranje i snajpersko djelovanje kao stalna izložbena postavka, organiziranje historijskog časa i sl. U organiziranju obilježavanja Dana opsade Grada Sarajeva 1992.-1995. mogu se uključiti i ostali subjekti u Kantonu Sarajevo i državi BiH koji njeguju i obilježavaju kulturu sjećanja na opsadu Grada i agresiju na BiH.

## **FINANSIJSKA SREDSTVA**

Finansijska sredstva za provedbu ove Odluke obezbjedit će se u Budžetu Grada Sarajeva za svaku godinu, a u zavisnosti od utvrđenog Programa aktivnosti za Dan obilježavanja opsada Sarajeva 1992.-1995. ili predloženog Projekta od strane gradonačelnika, a na koje će po prijedlogu gradonačelnika Gradsko vijeće dati svoju saglasnost u formi Odluke o davanju saglasnosti na Program aktivnosti i Projekat za Dan obilježavanja opsade Sarajeva 1992.-1995.

U skladu sa tačkom 3. Zaključka Gradskog vijeća br. 01-GV-02-416/19 od 26.03.2019. dostavlja se

### **Izvještaj**

#### **o prevedenoj javnoj raspravi na Nacrt Odluke o obilježavanju opsade Sarajeva**

Gradsko vijeće Grada Sarajeva na 26. Sjednici donijelo je zaključak br. 01-GV-02-416/19 od 26.03.2019. kojim je razmotrilo Nacrt Odluke o obilježavanju opsade Sarajeva i istu uputilo u javnu raspravu.

Određeni su subjekti u javnoj raspravi: sve općine i Kantonu Sarajevo, Vlada Kantona Sarajeva, Fond Kantona Sarajevo za zaštitu i održavanje grobalja šehida i poginulih boraca, memorijalnih centara i spomen obilježja žrtava genocida, Univerzitet u Sarajevu i Akademija nauka i umjetnosti BiH.

Za provođenje javne rasprave određeni su Gradonačelnik putem nadležne službe i Odbor za društvene djelatnosti Gradskog vijeća Grada Sarajeva.

Određen je rok trajanja javne rasprave do 29.04.2019.

Primjedbe, prijedlozi, mišljenja i sugestije iznesene u diskusijama radnih tijela Gradskog vijeća i gradskih vijećnika, na sjednici Gradskog vijeća Grada Sarajeva, tretirat će se kao prilog javnoj raspravi.

Do 29.04.2019., do kada je trajala javna rasprava o predmetnoj Odluci, svoje mišljenje, prijedloge i sugestije su dostavili:

- U okviru Vlade Kantona Sarajevo mišljenje je dostavilo Ministarstvo zdravstva KS i izjasnilo se da nema primjedbi niti sugestija.
- U okviru Vlade Kantona Sarajevo mišljenje je dostavilo i Ministarstvo za rad, socijalnu politiku, raseljena lica i izbjeglice KS i izjasnilo se da nema posebnih primjedbi ni sugestija.
- Općina Stari Grad Sarajevo je načelno saglasna sa Nacrtom ove Odluke uz mišljenje da bi Odlukom, općinama koje ulaze u sastav Grada, trebalo dati mogućnost predlaganja programa, odnosno projekata u cilju obilježavanja opsade Sarajeva, dok će konačni program aktivnosti utvrditi Gradonačelnik Sarajeva.
- Komisija za Statut i akte Gradskog vijeća Grada Sarajeva sugerira Gradonačelniku da izmjeni naziv Odluke, tako da glasi Odluka o Danu obilježavanja opsade Sarajeva 1992. – 1995.

Ostali subjekti u javnoj raspravi, do utvrđenog roka, nisu odgovorili.



Bosnia and Herzegovina  
Federation of Bosnia and Herzegovina

**CANTON SARAJEVO**  
Ministry of Veteran's affairs

Bosna i Hercegovina-Federacija Bosne i Hercegov.  
Kanton Sarajevo - GRAD SARAJEVO  
GRADSKO VIJEĆE

PRIMLJENO: 13-05-2019			
Org. jed.	Broj	Entitet	Vrijednost
01-05-05-569/19			JPB

Broj: 06-05-16328/19  
Sarajevo, 23.04.2019. godine

## GRAD SARAJEVO

### Gradsko vijeće

ul. Hamdije Kreševljakovića br.3  
71000 Sarajevo

**PREDMET:** Nacrt Odluke o obilježavanju opsade Sarajeva, mišljenje, prijedlozi i sugestije, dostavljaju se ;

**VEZA:** Vaš akt broj : 01-05-2511-10/19 od 03.04.2019. godine upućen Vladi Kantona Sarajevo

Ministarstvo za boračka pitanja Kantona Sarajevo je razmotrilo Nacrt odluke Gradskog vijeća o obilježavanju opsade Sarajeva, koja je po nalogu premijera Kantona Sarajevo dostavljena ovom ministarstvu radi učešća u Javnoj raspravi, te Vas obavještavamo o slijedećem:

Skupština Kantona Sarajevo je donijela Odluku o usvajanju Projekta " Opsada i Odbrana Sarajeva 1992-1995. godine" ( Službene novine Kantona Sarajevo ; broj 9/06, 15/07, 35/12 i 29/15), koji se sastoji od 12 ( dvanaest) Potprojekata koji posmatrajući odvojeno predstavljaju zasebne Projekte i koji imaju za cilj da obuhvate sve značajne vrijednosti i tekovine odbrambeno- oslobodilačkog rata "1992-1995. godine". Istom Odlukom za sve Potprojekte su određeni i nosioci aktivnosti koju su zaduženi za njihovu implementaciju.

Kada je u pitanju Nacrt Odluke o obilježavanju opsade Sarajeva te definisani ciljevi koji nam govore o aktivnostima, svrsi i sadržaju njenog uspostavljanja, možemo konstatovati da se ona može posmatrati u odnosu na Odluku Skupštine Kantona o usvajanju Projekta " Opsade i Odbrane Sarajeva "92-95". godine u korelaciji sa definisanim Potprojektima iz gore navedene Odluke i to:

1. Potprojekat obilježavanja značajnih događaja, datuma i ličnosti iz perioda odbrambeno- oslobodilačkog rata 1992-1995. godine ( Kalendar za obilježavanje u kojem su definisani značajni događaji, datum i ličnosti, nivoi obilježavanja kao i nosioca obilježavanja), ( Službene novine Kantona Sarajevo, broj : 9/08).

6. Potprojekat obilježavanja vatrenih tačaka opsade i odbrane Sarajeva.

Sa aspekta prvog potprojekta Skupština Kantona Sarajevo je donijela Odluku o utvrđivanju " Kalendara za obilježavanje značajnih događaja, datuma i ličnosti iz perioda odbrambeno- oslobodilačkog rata 1992-1995. godine na području Kantona Sarajevo", kojim su u stavu II definisani značajni događaji, datum i ličnosti iz



web: <http://mbp.ks.gov.ba>  
e-mail: [mbp@mbp.ks.gov.ba](mailto:mbp@mbp.ks.gov.ba)  
Tel: + 387 (0) 33 562-012,  
Fax: + 387 (0) 33 562-251

Sarajevo, Reisa Džemaludina Čauševića 1



perioda odbrambeno-oslobodilačkog rata 1992-1995. godine na području Kantona Sarajevo, određuju nivoi finansiranja, nosioci i način obilježavanja.

Stavom VI iste Odluke je definisano da značajne događaje, datume i ličnosti koji nisu sastavni dio Kantonalnog Kalendara utvrđuju svojim Odlukama Grad Sarajevo i općine u Kantonu Sarajevo, kojim propisuju nosioce i načine obilježavanja i osiguravaju sredstava za finansiranje iz vlastitih izvora.

S obzirom na gore navedeni stav Odluke smatramo da Grad Sarajevo ima mogućnost da izvrši izmjene i dopune svog Kalendara koji se odnose na značajne tekovine iz perioda 1992-1995. godine i u tom smislu smatramo važnim da se zvanično definiše datum Opsade Grada Sarajeva i na dostojanstven način obilježava.

Sa aspekta Potprojekta br. 6. Odluke, a s obzirom na bitnost njegovanja tekovina iz perioda odbrambeno-oslobodilačkog rata 1992- 1995. godine Ministarstvo je u saradnji sa Zavodom za izgradnju Kantona Sarajevo angažovalo Stručni tim za izradu Elaborata Potprojekta “Obilježavanje vatrenih tačaka opsade i odbrane Sarajeva 1992-1995. godine”. Elaborat je završen 2007. godine. Elaborat je predvidio da se 42 kilometra linije opsade i odbrane Sarajeva definišu na mapi, da se prepoznaju neuralgične tačke odakle su se ubijali građani Sarajeva i odakle su djelovali tenkovi, prage, snajperi i drugo oruđe i oružje, te da se na tim mjestima postave panoi i simbolično delaborirana oruđa i oružja, kao i da se uredi staze i drugi sadržaji koji bi bili uzajamno povezani i prohodni. Takođe je 2012. godine urađena specifikacija potrebnog oruđa i oružja te druge vojne opreme za potrebe implementacije ovog Potprojekta, te u saradnji sa Javnom ustanovom JU “Muzej Sarajeva” prosljeđena Ministarstvu odbrane BiH. Međutim, Ministarstvo odbrane još uvijek nije odobrilo i izvršilo delaboraciju sa obrazloženjem da čekaju Odluku Predsjedništva BiH, koje daje konačnu saglasnost.

U tom smislu smatramo da bi usvajanjem Odluke o uspostavi Dana opsade Sarajeva 1992-1995. godine svi zajedno dali dodatni doprinos, kako bi se Projekat obilježavanja vatrenih tačaka opsade i odbrane Sarajevo “92-95.godine” konačno stavio u funkciju.

S poštovanjem,

**Obradio:** mr. Handžić Emir

**Kontrolisao:** Osman Smajlović



**Dostaviti:**

- naslovu,
- a/a.



web: <http://mbp.ks.gov.ba>  
e-mail: [mbp@mbp.ks.gov.ba](mailto:mbp@mbp.ks.gov.ba)  
Tel: + 387 (0) 33 562-012,  
Fax: + 387 (0) 33 562-251  
Sarajevo, Reisa Džemaludina Čauševića 1

